



FOTO: MILENA EHRENSPERGER

Soglio – svilup d'in cumin da muntagna – e Viamala – la istorgia dals pass Grischuns: Exempels da perscrutaziun en il «Handbuch der Bündner Geschichte».

PERSCRUTAR IL GRISCHUN

Il trafic sur ils pass grischuns, la trilinguitad cun tut las testas diras che tutgan tier, las armadas estras che per tschientaners èn passadas tras nossas vals, ils prims turists a spass per las muntognas accompagnads d'inqual chatschader, il tragliun sco antiquitad ... Noss chantun cun sias variaziuns geograficas, istoricas, linguisticas ed economicas porscha in vast champ per perscrutaziuns da tut gener.

In'organisaziun che s'occupa da la perscrutaziun scientifica da tut quai è la Societad per la perscrutaziun da la cultura grischuna. Ella exista dapì il 1986 e sustegna en em-

prima lingia l'institut omonim. Sco ch'il manader da quest institut, dr. Georg Jäger declera, vul ins promover er ina perscrutaziun interdisciplinara e fatga da scenziads giuven. Fin ussa han ins perscrutà ils champs d'istorgia populara, istorgia d'art e musica, da l'architettura e da la vita da lavor.

Da questa lavor èn sa resultadas pliras publicaziuns sco tranter auter: «Kunst und Landschaft in Graubünden» da Leza Dosch, «Der Bündner Kreuzstich als Zeichen» da Julia Schmidt-Casdorff u «So ging man eben ins Hotel» da Marianne Fischbacher.

Il project «Interpresas el-

ectricas e l'electrificaziun en il Grischun» è en lavor. In program è er il project da retschertga «Il funcziunament da la trilinguitad en il chantun Grischun». La Societad vegn sustegnida be per part da chantun e confederaziun. Cun quai ch'ella nun ha anc chattà la miniera d'aur vulida per sia lavor, tschertga ella adina vinavant sponsurs, commembras e commembers. Ella porscha stupentas gitas e referats, ina revista cun bleras curtas contribuziuns davart lur champs da lavor e latiers survegn ins infurmaziuns interessantas davart inscunters e perscrutaziuns.

Anna Ratti

Societad da cultura

La Societad per la perscrutaziun da la cultura grischuna

- è la purtadra da l'Institut grischun per la perscrutaziun da la cultura a Cuira.

- Promova en collavuraziun cun las universitads lavurs da perscrutaziun davart l'istorgia ed il temp preschent da las culturas multifaras grischunas.

- Collavura cun instituziuns cumparegliablas en las regiuns vischinantas ed en l'exteriur cunfinant (mira Gion Crap)

- Ils projects da perscrutaziun vegnan accompagnads dad in cussegl da perscrutaziun che sa cumpona da docents dad universitads svizras.

Manader: Dr. phil. Georg Jäger
Secretariat: Magdalena Decurtins-Stecher

President da la Societad: Dr. iur. Hans Hatz

President dal cussagl scientific: Dr. phil. Roger Sablonier



Project d'electrificaziun: Centrala Andeer 1926.